

四庫全書

集部

欽定四庫全書

清江三孔集卷十

宋 孔武仲 撰

今體詩

至日拜表

絳闕橫霄瑞靄重
千官拜表未央宮
瑤琤玉佩侵寒漏
縹緲爐烟壓曉風
漢歷敢期隨日永
堯齡共祝與天同
賤生亦與華封祝
逢望清光斗極中

送希甫使蜀

漢節西南出征鞍萬里賒清朝早敷歷遠使更光華山
壯蠶叢國雲深杜宇家暫宣寬大詔恩信及天涯

苦寒

十年被冷東南方未慣清寒客帝鄉碧落有聲飛夜霰
輕裘無力拒晨霜鯨依海凍先摧鬣鴈起邊沙易失行
蒲柳脆肌尤不耐暫憑盃酒作春陽

大雪

窮年闕雨謾悲歌，喜見凌晨雪意多。
天上亂花初翦玉，樓頭密影已翻波。
亭臺著路纖塵斷，庭宇無風凜氣和。
寄語雲師勤覆護，莫令光景漏銀河。

寓目

啾啾黃雀在枝間，歲晚荒郊怨苦寒。
容易驚飛無處所，人家曾借畫圖看。

立春日是年幡勝方賜館中

開歲春寒便有花，官閒只飲酒如霞。
殿門促賀新幡勝。

書館年來事事嘉

次韻瀛倅鄧慎思見寄

官是麟臺却佐州蓬瀛俱稱列仙遊憶分曉色趨天闕
想對春風倚郡樓書付塞鴻應易到人如隴水正分流
江湖未有歸耕處何日相逢說旅愁

初賜幡勝戲和諸公二首

鏤幡翦勝喜傾朝不問紆藍與珥貂羣玉參差排晚日
萬花瑣碎動春霄蕙風已轉東郊綠柳雪猶低北苑條

從此恩波典溫律併隨歌頌入咸韶

拜賜匆匆早上朝公卿前列盡金貂日留愛景明雙闕
春逐恩輝下九霄靈沼輕澌猶覆水上林微綠已縈條
自慚羽翮非鸞鳳亦預彤庭舞舜韶

冬至夜飲

翠帶排銀燭金爐飄篆香人情感佳節天氣踏新陽醉
怯醇醪酒寒知碧瓦霜明朝指天闕萬壽獻君王

至節小雨

半醉聽銀漏輕寒解扇裴新陽萬物動小雨五更收宿
潤青槐道晨輝紫禁樓皇皇與天澤渾逐管絃流

游建隆觀

瑞雲靈迹久荒蕪琳館重開聳碧虛邂逅馬蹄過勝境
紛紜人世得仙居異花重疊春輝早喬木森陰晚景疎
金闕瑤臺不容久歸來風馭冷襟裾

淨因院赴浴

漢客疲江海乘槎萬里歸重尋象王舍一浣洛城衣壞

壁凝香靄明軒泛暮暉紅塵不相貸歸路驟駢駢

次韻宋履中歲晏言懷

寂寞郊居遠晨晡四馬馳日驚東逝水心感歲寒枝霜
色朝如洗雲容莫不怡梁園將密雪不飲亦奚為

次韻李至之席上作

歲月翩翩插羽過十年依舊歎蹉跎雁回燕塞鄉書少
雪滿梁園雅集多取樂醉鄉聊邂逅爭新談藪任紛羅
慇懃尚託摠衣舊逢許巴吟續郢歌

送曹千方奉使閩中

聞說乘輶美全關勝赴關先聲馳嶺海和氣入山川
路東籃輿過書憑塞鴈傳祝君求苻草醒我北窓眠

五鼓

永夜無塵事閒眠似道堂紙窓分曉色絮被借春陽萬
慮此中息一身今可忘周公不足夢佳趣在羲皇

孔周翰挽詞三首

邂逅湓江口方知叔父親榮華纔一夢奄忽幾千春白

玉洁何晚精金鍛愈真耆年所宜得天苦奪斯人

循吏今之選皇華使者軫關河初異路巾笏偶同朝急
景催遲莫清魂返沈寥一哀慚不達生理故風颺

晚歲班朝列光華動士林家風當冠豸官序正腰金霄
漢亨衢淺膏肓積沴深淒涼哭門館笑語尚餘音

黃幾道挽詞

當時京右盛朋從邂逅經旬託泮宮詩社苦吟霜月白
離亭縱飲酒盃空十年契濶江湖外百歲推遷夢幻中

行已臨民俱可述仍高孝友古人風

施夫人挽詩

有子紆朝服平居奉典彝蹉跎五鼎養奄忽百年期故
宅萱堂掩新阡薤露悲遺芳託壟白髮髯九泉知

司馬溫公挽詩五首

龍卧南陽久天回北斗高廟堂更政化巖谷起英髦正
色朝端肅華顛國務勞西州忽移翠風木動悲號

鼎鼎華元老朝廷倚上台除疴得鍼砭作解有風雷尚

冀松椿壽誰令柱石摧英靈參列宿餘惠在春臺
賜告恩稠疊聞喪上震驚秋原無喜色夜雨有悲聲世
路嗟存沒公心達死生蓬山預讎校新見史書成

高步朝廷上羽儀鵷鷺行精誠貫金石素節履冰霜爽
氣今仍在斯人沒不亡嵩雲自閒暇長映讀書堂

拙與世沈浮登門二十秋雲天曾送上風壑此來遊霄
漢三台坐江湖萬里舟振衣已不及慘愴逝川流

龜山寺納涼呈宗衍師

寶洞然香罷山堂問話中日將秋共淡心與境渾空彈
指看浮世披襟納遠風因知宴坐者白首樂無窮

泗州

天都佳氣鬱葱葱轉盼江河萬斛通可但臨淮稱要地
直因排泗有神功僧伽普照靈如在寶積都梁翠倚空
慚愧使星留客厚塵埃揮手各西東

寄武昌簿孫彥常

羈旅悠悠歲月殘勝遊無復似西山從容把酒來天上

滴瀝鳴泉滿坐間
醉思隨風飄碧落
離襟和月墮荒灣
逢應蠟屐頻登覽
簿領無憂多晝閒

館中呈魯直

慢詭翁魯直自謂

日過鼇山三丈紅
陳編相對鬢如蓬
朱門請謁無時了
且訪東鄰慢詭翁

試院書事呈子駿明叔三篇

憶初懷詔下天街
紅燭相隨御史來
場屋喜遵新定格
朝廷思見已成材
誅鋤險異歸平坦
洗濯英華出草萊

文藻諸生皆足用更期儒行比騫回

當年場屋未分袍文陣今將逸對勞
紫綬飄香還序拜畫堂橫幕看揮毫
心遊造化羣鷲靜筆吐虹霓萬丈高
長育人材今久矣行看中選盡英豪

汾陽韋曲盡名臣邂逅羣居得遠孫
玉琢兩圭看德器河傾千里瞰詞源
駕行平日隨朝謁鼎立今朝定討論
只恐門開便分散追風難認馬蹄痕

試院呈上官御史

當年容與樂虞庠今日掄才道更光但愛襟懷無岸谷
不知銜位帶風霜氣鍾海上仙山秀袍擁天邊玉樹香
衡鑑賴公歸一律明朝歸馬快騰驤

試院書事呈同僚諸公

九衢奔走厭紅塵官舍連朝得閉門瑩靜軒窓移白日
青熒燈火送黃昏披衣已愛星辰爛奉御方瞻斗極尊
早晚虞庠誇得士相隨笑語入天閭

送梅子明還吳

姑蘇限雲水官舍隱蓬萊出汴青山湧橫江畫舸開家
園雖渴別書社早歸來新命鄉人喜神仙舊姓梅

大業二絕

西苑池塘涸海流君王十騎月中遊蛾眉排戶爭新寵
不道迷藏自有樓

杳杳揚州只隔淮龍舟彩舸映天來春風咫尺伊川路
不放君王殿脚回

夏日入館

青驄曉轉綠槐陰
金碧重重魏闕深
洞裏天花長帶露
門前畏日自流金
雲臺朱檻鄰星斗
石室牙籤照古今
宦學從來難兩得
君恩優假是書林

四月二十二日拜第二表請御正殿

驟雨鳴宮瓦
新槐密禁城
鴛行趨曉肅
雞唱入雲清
日晃千袍影
風傳萬歲聲
天心求允協
飛奏入承明

大熱歸城西止于興國戒壇院

紅塵迎馬盡飛浮
日脚橫天凝不流
金碧崢嶸涼意動

歸軒聊作化城游

館中夏日

珍簟舒明玉涼窓納碧天
殿樓傳遠鼓宮井取深泉
竹籜風頻脫榴房晚更鮮
却驚非故國五月未聞蟬

直舍新闢西窓二首

推倒西牆平日功
暑天饒作一窓風
人間豈有炎涼隔
只在施為向背中

幾歲榴花蔽曲隈
繁陰初逼坐中來
西鄰小檻如圖畫

偷入簾帷次第開

待朝

山軒斜透山南月
坐看天邊桂影移
圓扇矮牀涼透骨
忽忽無奈上朝時

次韻天覺行縣

餘涼一作霜凜凜認乘驄
分走郊圻督事功
照路官儀驚

衆目快襟詩思有清風
隋河楊柳縈天上
魏闕觚稜在
夢中朝會相逢
勞行色滑稽酬對興無窮

碧蘆蓼花在天慶觀

御水泱泱繞禁闈
碧蘆紅蓼轉相宜
玉堂金闕非人世
亦有繁華具盡時

遊籍田三首

酷暑不可追
天郊聊共尋
雲繁當飛蓋
風好得披襟
白水疇遠紅蕖浦
淑深斜川陶靖節
千載想知心

杖履重林外
樽罍曲水邊
深荷時下鷺
喬木正嘶蟬
敏捷文椒戰
清涼竹簟眠
浮瓜復沈李
况有主人賢

落日隱山谷清風來戶庭爛柯碁已罷伏檻酒初醒歸
轡須長驚都門偶未扃辛勤到蓬華林表已華星

書省即事

恩旨讎書到午休笑談連手得優游窓聲漸漸回脩竹
庭實鮮鮮禪石榴風色洗清天畔闕鼓聲遙轉日邊樓
羣仙暫駕飛鸞去從此蓬山更少留

六月望參

宿露初晞物向陽袍鞋如水轉迴廊天開北極星辰正

風應南薰殿閣涼
棠莢已瞻圓魄就
槐花初覆廣庭香
朝廷禮數優元老
獨後千官拜未央

謝彥成子姪四人同時登科調官南歸

處士好孫子
秘書賢弟兄
弓旌萬里會
蘭玉一家榮
盛事酬先志
清風警後生
田園何足道
力學是功名

馬上有作

宮城北轉亂蟬嘶
喬木陰雲水滿陂
一陣風來掠華鬢
江湖清興有誰知

送傅龍圖帥秦

公才卓犖有施為鎮俗安邊正及時東壁圖書遷秩峻
西州父老歎來遲門開細柳軍無匹劍下樓蘭敵未知
聞道秦州多勝迹登高能廣少陵詩

送景文之官明州

京塵不可久得地海潮東市郭滄溟上庵巖翠嶂中江
瑤如切玉越女不施紅官事從容了時當作醉翁

送天覺使河東

張郎肥馬衣輕裘俊氣軒軒不解愁曾立玉墀聯近侍
新持金節領諸侯屠龍伎倆終須用探虎功名未肯休
去矣范滂聊緩轡太行雲路戒推舟

坤成節南宮賜宴

盛德千齡會坤成四海觀南琛走交趾北賁引呼韓紫
極經躔近文昌步武寬橫天起嵩華照地集琅玕美酒
來天祿珍馐賜大官鑪煙凝棟宇冰雪襲盃槃瞻拜人
心服山呼士氣歡風清百尺廡花壓兩梁冠雷作聞過

鼓聒升看戲竿華裊舒霧靄妙舞起波瀾喬木秋聲遠
高城夕照殘天街淡佳氣振鷺香歸翰

送芸老通判

御史連章乞此行制書優遣副專城京都豈乏翱翔處
忠義先期去就明祖帳盃槃留晚色關山草木動秋聲
西州莫作經年計早晚君王召賈生

有旨放八月朔叅

八月大明宮朝班放會同天時鬱殘暑聖語似清風蕙

帳便秋睡沙隄緩曉驄
葵心終不已長望日升東

聞王師破洮河城獲鬼章

時在同文考
試不與入賀

盛德包荒與古同十年關塞古洮戎
神兵合沓來天上
猛虎逡巡落檻中蜀境粗償關羽恨
漢津今秦武皇功
城陰却歎周南滯夢想鷓鴣行紫禁東

次韻鄧慎思初入同文館

慎思被薦於廣東時先
為轉運判官有詩贈行

十載江湖萬里行偶來西館閱豪英
雲龍九闕晨書詔
燈火千門夜出城瀟洒庭除當月色
重稠幕帟斷人聲

年家兄弟今同舍會見河南起賈生

次韻余樗年同文館書事

衡門咫尺限關河此地平時匹馬過
欲把塵埃比山嶽
寧辭羽翮寄置羅華堂翠幕
供閒燕明月清風伴嘯歌
擬寫秋容須筆力新詩句句似陰何

酒帘

閃閃風中誇綠櫺當年匹馬下旗亭
秋原敗葉聲如掃
只有雲山伴醉醒

呂推卿出孔雀畫圖

晝卧蓬山禁漏長起觀名畫得心降曾聞飲啄依南海
頗怪飛鳴到北窓峭格正宜風作馭脩翎堪與鳳為雙
知公物外尋幽好不戀榮華擁節幢

上禪除恭謝迎駕有作

仗衛風生下玉宸傾都瞻望屬車塵乾龍已應飛翔始
震鬯方觀薦奠新星象低回隨曲蓋天閭蒼莽入鈎陳
麟臺亦與班迎末不美甘泉作賦人

送張文潛之淮南

瀛館登仙俊金閨引籍優辭班見天子行色動諸侯楚
日籃輿暖淮南畫舸道歸時春已好遲子曲江頭

蛤蜊

去年曾賦蛤蜊篇旅館霜高月正圓舊舍朋從今好在
新時節物故依然棲身未厭泥沙穩爽口還充鼎俎鮮
適意四方無不可若思鱸膾未應賢

送崔伯陽守潁州

聽說州除美州臨潁水清風謔帶京洛湖島似蓬瀛昔
泛扁舟下今聞太守行山川應好在為道旅人情

十一月十六日入館

一雪初乾曉日紅行人爭道已憧憧泥縈馬足行初躓
寒犯貂裘力正濃地逼新陽雖喜氣雲垂滄海更愁容
便應買酒邀儔侶爛醉高眠羣玉峰

送游景叔使陝西

諭指巖生不憚勞為君談笑取臨洮車復歷秦關險

繡屐新瞻漢殿高，直使三農歸隴畝。
勤將尺紙薦英豪，峯嵐澗水香山路。
想見春風動錦袍。

臘月三日

寒窓勁色曉覃覃，人見京華臘月三。
官渡梅花應照水，香清回首憶江南。

雪後

萬里屯雲一夜收，天街累日未通牛。
峩峩正覺嚴冰起，灑灑還同澗水流。
色變荒郊迎日媚，氣蒸黃壤逼春浮。

農家不用藏乾麩相與新年飽麥麩

興龍節上壽

瑞雪莪莪宮殿明千秋佳節會公卿香飄彩霧紫天仗
酒浥流霞滿壽觥密勿華封多好語鏘洋鈞奏盡和聲
自憐初預稱觴樂江海飄萍已半生

葡萄

萬里殊方種東隨漢節歸露珠凝作骨雲粉漬為衣柔
綠因風長圓青帶雨肥金盤堆馬乳樽俎為增輝

金橘

暑岸千株綠秋庭萬點黃
明晶能奪目圓滿要經霜
瑞露凝膚滿甘泉沃肺涼
美滄不解事金椀薦檳榔

送王頤赴官八桂

久不憶桂海因君還起予
江光平漫石山翠上凌虛
黃港窺尋舊青衫黽勉初
年豐桴鼓息清趣在琴書

獻西俘

先帝謀西域邊功未告成
一朝鋤狡穴萬里振天聲
漢

獄宜歸死湯羅尚借生淮陰甘就縛頡利許留京雲氣
占中國星辰闢大明珠簾垂後殿玉座肅西清二帝臨
朝會千官響珮珩理司來執訊譯者為通名殊俗衣冠
異渠魁口眼寧孽狐仍俯聽窮鳥尚悲鳴上德均乾覆
臚傳貸鼎烹大廷觀舞獸滄海息波鯨祿給朝晡精書
通父子情熊羆已馴伏螻蟻敢縱橫憶昨初擒寇無慚
古用兵謀謨維素決軍事許專征蕃漢心諧會人祇力
混并波濤迷闕渚氛霧壓洮城慘淡移天陣逡巡却寇

營空拳槌猱猱隻矢墮攬搶雜種降無數良民市不驚
旂常配方召干羽繼韶莖奏捷公卿貫酬勲將佐榮夏
戎幾失筋遼主願尋盟詭道吾何用沈幾見未萌終軍
雖喜事勿復請長纓

送仲至學士使北

聖筴招懷萬里戎累年南向不彎弓休論邊使千金費
絕勝爭城百戰功古驛玻璃晨煖酒隆山狐貉暮排風
歸途剩記殊方事付與麟臺逸史中

喜雪十韻

此夜不成雪明朝應作霖細聲來戶牖爽氣入裯衾窺
隙疑相射循簷覺更深因風成倒陣過竹有餘音畫閣
迷釵玉旗亭付酒金封漫碧澗曲點綴假山岑鶴氅行
何麗牛衣卧不任漁庵平易失樵逕浩難尋却赴明光
賀潛追霏霖吟天街立馬望雙闕正球琳

答宋履中見贈

粉袍如雪會羣英往歲曾當月旦評夢想十年嗟舊事

翱翔三舍羨新榮相如素擅為文麗班固終期作史成
潦倒詎堪君借重篇詩今見古人情

元日值雪

東皇點綴一何工飛下琪花頃刻中變盡樓臺成夜月
不容車馬競春風崎嶇廣市黃泥污冷淡羣山彩闕紅
野叟相逢應更喜從來盈尺瑞年豐

次韻李端叔見贈

君才瀟洒應時流久滯寧非命壓頭昨見河南推賈誼

行聞天子召吾丘已無痛飲觀風味猶有新詩講報投
京洛塵沙著人甚清涼高爽憶宣州

留題無咎卧陶軒

南陌塵如霧北窓清有餘雖無彭澤柳已富鄴侯書
永禽音緩門閒馬跡疎條然即高枕嘉興擬湓廬

直舍之西植竹兩叢經歲甚茂

去歲披雲自訪尋交加綠玉已成林肯隨春圃羣芳老
喜對秋庭數畝陰巴峽廬峯聲浙瀝渭川斜谷氣蕭森

軒窓咫尺收佳趣不負東南萬里心

寄會稽丞趙振道

龜峯琬琰翠成堆軒檻前當秀色開此地登臨比圖畫
與君談笑繼樽壘傳聞佳景無時乏依舊清江不斷來
今日關河隔千里相逢何處少徘徊

寄題程郎中家圓石

翦斲蒿萊得好峯縈紆裝點思無窮尋幽已到神仙境
發秘渾爭造化功官序隱登臺閣上夢思遙寄水雲中

扁舟我亦謀歸去暫向巖前作醉翁

送高善時赴官

王國方登俊清才尚折腰堂堂餘愴在瘴海此行逢宴
語無疎濶離懷但黯銷紅塵一羈旅風馭羨飄飄

次韻李端叔

此身萍梗厭漂流慙寄潯陽江上頭勝景長年闕夢寐
輕裘何日返林丘扶搖莫作扶搖計樸檝應容樸檝投
徙倚高樓情不極恰如王粲在荊州

文德朝參退舉觴觥于幕下歸館中頽然醉卧官
曹多暇未有如此因作四韻以識

朝罷千官卷寫行袍衣猶帶御前香偶傾天上流霞美
便忘壺中白日長叢竹娟娟簾遶碧回風浙浙殿分涼
翛然不與人間事未信無何別有鄉

休日出城西

秋懷不可奈驅馬漕河邊川躍時聞鯉林嘶已斷蟬勞
心逐外物回首是殘年強作遨遊計登臨却黯然

聞袁思正卒于宿州

畫舸西河載酒回東籬持菊待君來何知頃刻成千古
不及從容共一盃羈旅夢魂難際接平生交分但悲哀
中年萬事長心惡何處愁眉得暫開

偶書

夜枕唯便睡晨窓不展書學文真漸懶與世況全疎老
合耕山澗恩容寄石渠食糴亦堪飽不歎食無魚

夜直東觀

蕭散愛閒官因循亦厚顏聊休俗士駕獨宿道家山風
幔自舒卷月窓重閉闕其如江海夢已與雁飛還

次韻宋履中兄弟九日詩

遙知把酒對重陽簷外秋聲葉半黃落帽想當追故事
披襟仍喜得新涼自憐僻處真匏繫只羨清吟屬鴈行
聞說家楹增壯麗落成應計到華堂

送范中發蘄州

漢南行樂不可復殿中立班時會君華省方看列宿貴

名州歛見左符分飄蓬聚散古難必塞馬去來烏足云
出處行藏君素達吟情聊對祖山雲

寄題徐季叔桂香亭

淮縣築居好桂亭牽輿長偶分巖下影別有月中香瀟
洒欺松竹巖凝耐雪霜從君酌樽酒歲晚玩幽芳

十月朔過殿

平曉清風響北林大明宮殿肅陰陰雕輿來息雲天上
黼座遙瞻斗極深庭廣袍衣自相照朝回幡蓋尚餘音

太平文物多師古想望漢唐猶視今

十二月十二日後殿朝參

廣殿沈寥邊鳴靴赴靜鞭中霄黃道直諸御錦袍鮮夜
雨塵如洗秋槐影尚圓銀臺不奏事人樂太平年

十二月十六日後殿朝謁

晨光先到帝王州別殿珠簾不上鉤萬歲聲齊山獻壽
九門朝退海分流參差雉尾回丹陛杳遠雞聲下禁樓
年少曾來奏詞賦鈞天却記夢中遊

苦寒

晨風獵獵卷書堂坐愛松筠耐雪霜
歲律崢嶸催暮景時光宛轉逼新陽
金卮滿引顏雖解石火深籠焰不長
安得仙家却寒術吸吞霞氣赤城傍

武仲伏蒙寵寄新篇不忘往事恩誼甚厚謹依嚴韻和酬伏惟台慈特賜采覽

治才優似尹京年餘思吟哦入彩牋
元帥子孫真將種翰林風格自天仙
追隨盡臘無留刻揮染香煤有剩妍

盡是從容雅歌事銘功何苦勒燕然

壬申仲秋與東觀曝書之會謹賦五言四韻律詩

一首

秋風解煩暑尊俎可從容盡會青雲士來遊羣玉峰琅
函窺一一金鑰發重重四庫傳觀喜惟應吏困供

武仲伏蒙知府待制寵示新詩課成短篇以獻左

右

侍從榮依日月光更因盤錯試鋒鋌諫書不止時無事

訟詰無留日倍長舊好葭莩容間見新篇錦繡得家藏
自慙思涸無高韻蒿管何因擬鳳凰

寄子由

江上忽忽別孤舟誰與言塵今生我甌盜肯過君門水
石吳山好風嵐楚澤昏相望欲命駕何日為東轅

極目亭有作

浩蕩江風動客襟短亭清晚一登臨亂霞藏日半天纈
淥水浸空千頃金壯志未成游學恨素交將散別離心

前山更有難尋景試為閒來一苦吟

次韻介之

亭上掀簾試解襟遠山崑崙勢前臨前灘濺沫鏘鳴玉
落照蒸霞映翠金運筆欲回天地力高談直造聖賢心
於中覽景宜誰預願結夫君此笑吟

江上晚行寄介之

廉纖一雨適春閒擊劍悲歌氣滿顏消破古今惟日月
補完風雅只江山我因為旅成拘滯君此安居得往還

一夕竹窓燈燭照論文談易兩俱閒

早春

密雨霏霏欲結霖
洒開青帝發生心
風吹嫩草迸微綠
雷碾長空破積陰
啼鳥隨陽聲自得
卧龍思海意尤深
更看三月桃花浪
舊鬢凌雲在尺尋

介之會徐氏家飲薄暮不歸為詩招之

金鞍駿馬照朱門
樂會高張晉楚軍
狂客浩歌翻白雪
艷姬醉舞轉紅裙
花光灼爍筵前錦
酒韻氤氳盞上雲

爭似竹窓風月夜青燈殘茗細論文

次韻酬昌俠見貺之句

讀君詩句骨毛寒直恐吟來得意難
劃若震雷驚蟄戶爛如奎宿照雲端
鋒鉞刺截崑山玉意氣騰凌大海瀾
欲識詞源最清處露珠新滴水精盤

偶成

翦斷長翎入網羅十年光景怨蹉跎
欲提長劍為游說且卧空山學揣摩
砧杵夜寒醒醉夢風霜秋緊役詩魔

不須計較當時事黃卷書中寵辱多

秋日感懷

萬山松色鎖蟬鳴日透林陰上下清霜壓蒹葭連地白
風吹河漢滿天聲穹廬夜動陰山戍玉甲朝屯紫塞兵
願漱單于一杯血心隨鷓鴣過長城

贈子通

金石論交古所希朱顏相結少年時自嗟齷齪逢人少
尤喜軒昂出衆奇文字往來諧律呂笑談錯雜和墳簎

近聞俗語多讒間願子高歌錦與箕

和介之登樓見寄

俯瞰江城十萬家舊居却歎久荒遐
秋空雲片歸飛鶴古木藤陰屈結蛇
卧愛灘聲長在耳望窮山色接無涯
憑君命句天然景流落人間與衆誇

題介之小閣

畫簾初卷碧山低面面青藍翠拂衣
秋水暮天長一色渚鷗沙鴈或雙飛
煙霞逗眼光相亂松竹敲風韻更微

却笑屈原顛頽甚漁歌何苦淚交揮

江上

萬里長江一葉舟客心蕭索已驚秋
亂霞影照山根寺落日光翻水面樓
淺浦耀金知躍鯉前灘點雪見棲鷗
少年壯氣悲寥廓未忍滄江下釣鉤

夜歸口占示同行者

一天星月明如晝萬樹杉篁吟夏秋
隱約棹歌聞別浦青熒漁火見孤舟
身居簡冊三冬學心入滄溟萬里游

髻髻重陽正明日與君攜酒豫登樓

秋夕感懷

秋空雨過一掀簾萬象森森夜氣嚴
皓露滴人珠滿袖金風吹月鑑開
奩荒階蟋蟀動相感大海虬龍方退潛
物理窮通何足歎試開閭闔問洪纖

寄聶正甫

虎髯兩頰狀貌古開口論議辭非今
尚藏折劍萬丈氣空馳老驥千里心
六印他年新將相一瓢今日舊山林

黃雲斷天望不極想君何處方悲吟

送周正儒知梓州

東蜀國巨屏梓州天一方
浯川點城郭劍閣護池隍
鎮撫須賢守吁俞輟省郎
不應嗟遠別垂組正誇鄉



清江三孔集卷十

欽定四庫全書

集部

清江三孔集卷十二

詳校官中書臣張經田

助教臣常循覆勘

總校官知縣臣楊懋珩

校對官中書臣吳俊

謄錄監生臣楊兆豐

欽定四庫全書

清江三孔集卷十一

宋 孔武仲 撰

制

仙韶副使胥氏可充樂使管勾仙韶公事

元祐六年十二月某日勅某官古之人君燕處必有肆樂蓋所謂房中之樂者周南召南是也脩己治人之道入于耳而感于心有益于為天下豈特娛悅耳目而已

哉以爾慎淑幽閒久于其職俾正官屬均諧厥音節以
中和防其流逸以輔善志朕之視聽勤怠爾與有榮焉
可不勉哉

權發遣兗州翟思可除國子司業

勅某官先帝設三學以聚天下之賢才又復司成之官
以率其屬朕尊奉謨訓以勸學為先急乃者十月之望
臨幸東監酌獻于先聖之廟室引見諸生召儒官講說
先王之道喟然想見古之風烈知造士之本正在于此

可不擇賢師長以治之乎以爾思行義學術有聞于時
往在成均能推法度之意以倡學者已去而人思其歸
朝廷脩厥舊職夫善于始能推之于終則其成功加易
爾其勉之

中太一宮真室殿祈晴

天回素節人望豐年念嘉穀之將收值淫霖之相續惟
神主張萬有照臨六虛特開琳宇之嚴盡演琅函之秘
庶憑妙力早散積陰致歲序之順成解羣黎之愁歎

後苑華景亭開啟祈晴道場齋文

素秋茲始寶稼將成懼此陰霖害于農事集祇園之淨
衆繙花藏之秘文庶憑聖因上通于鴻造亟收淫雨遂
致于豐年

表狀

謝賜御筆詩表

臣武仲言今月二十一日伏蒙聖慈面賜御書望終南
殘雪詩一首者禁闈深靚特留已退之班宸翰精妍曲

示非常之賜旁均近列下逮孤生臣武仲誠榮誠感頓
首頓首伏惟皇帝陛下盛德日新多能天縱政事之暇
屢開通英經史之疑參訂羣論已究多聞之益更追絕
藝之游御玉宇之幽閒發星文之鈎曲臣久涵膚澤初
侍華林補天未効于片言拜貺輒均于諸老豈獨藏之
什襲垂畀子孫猶能罄乃一心上報君父臣無任云云

謝經筵賜宴表

經幄侍言甫訖帝王之大訓宸慈賜宴寔為臣子之至

榮荷天度之含容叨特恩之龐厚中謝恭惟太皇太后
德凝坤載治協離明謹律度以誠身正端源而馭俗申
命博帶之士入講金華之庭竊觀聖學之日新殆與古
書而契合淵默臨朝則體虞舜無為之化恭儉好禮則
稽召公敬德之言庶績其凝九功惟敘固將著見于實
效非徒紬繹于多聞臣等妄陳口耳之知曾乏涓塵之
補終篇甚幸示惠過隆金奏宣和聽鈞天于夢寐皇華
命侑滲湛露于蕭稂深惟稽古之勤罕及逢辰之幸致

君有道當取于百篇報上無窮更祈于萬壽

賀太皇太后聽政表

進踐尊名俯同庶政朝無乏事國有舊章渙號發于廷
中歡聲騰于海內中賀恭惟太皇太后陛下功高奕世
化浹中宮英祖當天已勤于內助先皇御極益重于母
儀建茲繼照之功寔賴含飴之德軍國多務宜專聽斷
之勞社稷永安咸仰維持之力遂贊唐虞之興運遠逾
姜妣之徽音臣官在遠邦迹遙清禁莫綴會同之列徒

深忤蹈之誠

皇太后表

奉遵舊典進受隆名中外觀瞻神人欣悅中賀恭惟皇
太后殿下塗山積慶沙麓凝神佐佑先朝坤順已刑于
四海扶持大運離明復照于萬方親奉願言首膺顯號
漢廷上壽永承長樂之遺周雅流音更比太任之盛臣
濫居部使最遠朝班聞新禮之遂行効歡心而徒切

謝歷日表

命羲和以平四時察璣衡以齊七政此堯之所以稱大
而舜之所以為明爰及熙朝著為定令中謝伏惟皇帝
陛下育物有道奉天無私惟是歷書莫非民事仍頒御
府之禮分錫守土之臣臣敢不宣布上仁遵行國朔豈
特土牛之出以示耕期庶幾玉燭之調少助和氣

貢物表

六典已頒盡循于治古四方所出宜上于有司聖憲維
新人情胥悅前件物或爭輝崑玉或等味楚萍貯以金

壺副之冰粉毓自地靈之富升于篚貢之珍野老獻芹
無補薦羞之美朝陽傾藿但馳就望之心

進鬱金香草狀

伏以祀享時脩上有嚴于祖考芬香旁達幽可格于神
明故雖植物之微亦備宗祊之用前件物載于周典生
自楚鄉秀鍾雨露之和氣掩蘭蕙之馥用參灌鬯餘芳
可襲于淵泉事等貢茅遠物亦登于包匭

進水晶葛粉白蜜狀

伏以萬國會同並馳于魏闕四方珍異參列于朝廷雖
述職以難親豈脩貢之敢後前件物山輝積瑩巖險凝
甘器純故用于范金粉白有疑于屑玉並沐化鈞之和
氣兼陳王府之上儀遠考夏書懼難任于厥篚近稽唐
典庶可藏于有司

慰皇帝表

路寢問安日期于康復宮車晏駕既近于彌留疾驛傳
聞多方號慕中慰恭以大行皇帝行堯之儉秉禹之勤

精思積于萬方疾疹生于六氣玉几尋頒于顧命白雲
遂返于帝鄉皇帝陛下大孝奉先重明繼照翼室盡遵
于故事衮衣已見于羣臣雖隆天性之恩無忽宗祧之
寄伏願抑曾參之小行振大漢之英聲率彼舊章答其
光訓詒謀燕翼方卜于遠猷以義斷恩必從于中制紹
休國統俯慰民心

慰太皇太后表

灾躔宮闕慟溢中外顧命已行仙遊不返中慰恭以大

行皇帝至誠願治精思致平拯弊掇遺脩文講武方議
升中之典俄聞晏駕之哀伏惟太皇太后陛下厚顧復
之恩感彌留之託許同庶政用濟多艱軍國事叢廟堂
責重願勿悲傷而廢務宜求節制以勝情易月除喪况
存于遺制臨朝共治益固于孫謀

慰皇太后表

華封祝壽方為千秋之期玉几傳言亟有六卿之召灾
躔宗社慟溢中外中慰恭以大行皇帝勤儉在躬夙宵

圖治爽豫偶從于新歲升遐遽棄于羣臣伏惟皇太后
久佐先朝親聞遺制後事當思于有助常情宜置之無
何頤神燕閒益隆于母道詒謀永久共乂于皇家

代賀登極銀表

伏以繼體承祧寶運屬千年之聖脩方旅實明廷來萬
國之珍最是遠邦敢稽常典前件物體均金錫氣秀山
川潔白無瑕上以喻吾君之德純良不偽下以將臣子
之誠于物雖微其心已至

代丞相謝曆日表

治歷明時預興于嗣歲置郵傳命均及于庶邦已與吏
民同瞻法象中謝恭惟皇帝陛下紹衣聖緒欽若昊天
授夏正之三朝協筭疇之五紀清臺密課內欽太史之
司明堂坐頒外謹諸侯之治璿璣成政玉燭均和臣敢
不祇奉德音式宣寶訓期致庶草之蕪少臻泰階之平
代賀建置塞鋪畢工表

開圻方維作新亭障威靈震疊種落乂寧已休版築之

工益廣農桑之業中賀竊以重湖之外二廣與鄰苞夷
夏以雜居職古今而未議皇武有赫睿斷不疑乃眷芙
蓉之郊旁接辰溪之域久迷異俗願齒編氓廓天之覆
而無私因彼之來而不拒剗其穢塞治以準繩拔淪溺
于重淵蒙光輝于久照伏惟皇帝陛下勵精治化應變
施為不恃堯舜垂拱之安獨居帝皇步驟之上龍荒沙
漠亦既駿奔洞獠林蠻豈忍遐棄開除道路之隘控壓
山河之衝佐以鳴礮立之崇壘輿情自勸掩宣王百堵

之功絕傲可通邁神禹九州之迹坐臻永逸胥樂太平
臣節使備員帥司承乏于國事無涓埃之補與邦人均
鼓舞之驩

代人復舊官謝表

分符守土曾乏微勞降命自天遽增新秩冒恩過渥撫
已若驚中謝伏念臣植性朴顓逢時忠厚因仍歲紀忝
竊朝行出使四方粗習關河之險入居九寺稍瞻天日
之光綬既短而汲深瓶汔至而自覆輒干邦憲宜寘刑

誅賴先皇之至仁從有司之輕典奪階一級以警其尤
假節三湘亦觀其効亟奉承于制旨俾牽復于寵名漸
洗積憂超逾始望此蓋伏遇皇帝陛下神明洞照睿聖
日躋播萬物于不言悉歸化育念多方之有罪咸就寬
平遂俾弱材均蒙寵數考今官制視昔御曹班列寢崇
祿廩加厚撫躬則幸圖報謂何茲力負山雖任難堪之
勢葵心向日誓殫不懈之忠

代謝太皇太后表

出守遠方久違帝所恭承新命特敘官聯竊寵逾涯視
榮為懼中謝伏念臣家于伊洛生邁唐虞襲累世之軒
裳幸不乏祀齒諸生于學校遂以決科叨踐周行疊當
煩使向被先朝之收錄得陪羣俊于京師謀不見機動
或失當干有司之法甘寘嚴誅奪所居之官祇從薄責
歲時未幾光寵復還顧朽質以知榮念大恩之莫報此
蓋伏遇太皇太后陛下撫重熙之運承烈考之謨在宥
四方陟降多士當罪戾初至固難屈法而伸恩及日月

屢更謂能遷善而遠罪遂循常憲俾進今階敢不惕勵
乃心祇勤所職庶有涓毫之補以酬覆載之仁

代到任謝皇帝表

定武之鎮雄于北方別乘之權亞于刺史宜得賢俊以
充使令豈容衰疲輒茲忝冒中謝伏念臣初無可喜之
才技徒知自勵于廉平遠使湖湘累更歲月瘵官誤事
尋為御史之所彈觀過原情是亦君子之宜恕坐索長
安之米久奉紫宸之朝遠承制書俾佐藩府官廩豐渥

私計便安此蓋伏遇皇帝陛下若日之明如天之覆萬
方有罪待以公平一夫向隅為之慚但知臣粗守節義
察臣非好功名付以治中觀其為政解縱縲紲已荷于
至仁策勵駑駘尚期于後効

代謝太皇太后表

乘傳南州已不勝任題輿北部復俾親民荷天恩之矜
容積私心之覲愧中謝伏念臣材能薄陋蹤跡孤貧承
命先朝出使遐服昨興煮海之法自有倡議之人一簣

障河誠難與敵三言成虎孰克自明尋被劾于憲臺遽
罷還于朝列栖遲浸久忼慨欲歸尚叨別乘之除已過
平時之望此蓋伏遇太皇太后陛下承顧託之重擁穹
昊之休用人不廢其所長行法每戒其太甚知臣素謹
察臣不苛採于積毀之餘付以治中之任况復大河之
朔定武為雄軍旅精嚴簿書簡寡從容談議敢肆于便
安黽勉施為更圖于補報

代賀太皇太后表

上追祖武特重母儀備號既升絳區胥悅中賀恭惟太
皇太后徽音振世懿範承天塗山啟興禹之謀文母宣
佐周之力內脩陰禮外翊皇圖有維持三朝之功寔久
長萬世之業彤管不足以紀美景鐘不足以垂休惟是
顯名厭然羣望臣越居外計阻造中庭聞命以行與民
偕喜

賀皇太后表

上嚴孝治追本于慈聞國謀禮經致隆于顯號慶行宮

掖喜泱寰區中賀恭惟皇太后坤配執柔母臨脩順統
紀中宮之政發揮天下之儀篤生睿明熙復康靖極四
海以為養盡萬舞以著功欲播昌暉又增美稱掩周京
之純備極漢典之尊崇臣越守外司獲聞盛事其為抃
蹈寔萬等夷

進銀狀

國家盛節推重于母儀臣子微誠交脩于庭實前件銀
利叅六府名列中金以充貢篚之輸聊為慶禮之助

代謝到任表

佚老之求屢干於蠖濩分麾之寄偶及于單平翳在清
朝獲從私欲中謝言念臣卑緣世祿獲綴仕途內竭勤
勞仰當任使承流宣化五綰乎羣章問俗觀風四持于
使節愚者之慮或有得公家之利無不為齒髮既衰筋
力微耗遂懇辭于繁浩將就養于安閒果被俞旨皆從
始願此蓋伏遇寬仁秉德忠恕宅心矜淺陋之無他効
驅馳而甚久當茲遲莫復得優游况分軫之輿區迺乘

輅之舊地紀綱已立無事于更張風俗素諳不煩于經制庶與民而鎮靜以報國之寵休

代免加恩狀

嚴禋既畢大賚遂行夫何備員亦忝異數中謝臣某竊以內脩庶政外撫四方人皆乂寧物不疵癘乃即履長之吉以伸拜貺之虔夷夏駿奔天人胥悅此皆陛下始于憂勤而措世之治終以誠實而接神之驩臣有何功例蒙此賜伏望亟頒明命追止謬恩庶使孤危不貽非

訕

謝加恩表

剡章上達祈止濫恩批詔下臨重追成命循涯知愧忝
拜增華中謝恭惟陛下獨運聰明以躋至治而臣備位
大臣殊無所補陛下親執珪瓚以事上帝而臣獲觀盛
禮固以為榮更叨寵靈尤覩面目褒功賜號越等進階
仍廣爰田且加其賦忝然衰朽何以堪任假人以名既
莫容于退託報國之誼當益誓于糜捐

代乞致仕第二表

桑榆暮景方乞殘骸金玉徽音未俞誠請再輸悃悞仰
瀆高明中謝伏念臣蹤跡孤艱技能蹇淺自小官之賤
致位近司及華髮之衰親逢聖主萬事皆歸于獨斷四
方已格于太平固可偷安盛時竊處高位其如精神耗
盡筋力疲駑恩不加誅義當求去伏惟皇帝陛下乾坤
覆育日月照臨憐臣久効驅馳察臣不任鞭策解其重
任賜以餘年當國無功徒玷秉鈞之列歸田有路願同

擊壤之懽

第三表

年將七十合乞退休瀆已再三未蒙俞允更披肝膽前
冒冕旒中謝伏念臣遭逢文明忝竊名位陛下春秋鼎
盛而臣齒髮之已衰陛下睿聖日躋而臣心力之加耗
雖哀憐其不逮然慙負以無容上辜國恩下畏物議此
臣所以疚思反覆懇請頻煩伏望仰軫睿衷俯全晚節
許臣上還印綬使臣歸老里閭耄矣無能已久妨于賢

俊退之以禮亦仰荷于恩慈固匪飾詞所期得請

代謝上表

論材則寡議寵則多拜命若驚撫躬無地中謝臣技能
至淺聲跡甚微早奉德音出分使指雖歷時之已久然
考績之尚幽方此熏心常虞罪去豈期儻幸乃獲階升
此蓋伏遇陛下明合照臨德參覆載知臣可以驅使察
臣粗著勤勞必欲責其成功所以進之一級在臣之分
此亦有餘報國之心死而後已

代得郡謝表

投閒置散永合沈淪蕩垢滌瑕尚蒙收錄寵光逾望感涕交頤中謝臣發跡書生濫中仕籍因循半世久抗俗塵新美百為晚逢聖作乃欲竭平生之心智希萬一事功出擁詔使之車入持從臣之橐其如力小任重福過災生思慮迂疎措置乖戾自取褫逐夫何怨尤栖遲山谷之深夢寐宸極之遠明時可惜覽華髮而內驚舊物不遺假朱轡之就徒仍叨善地稍振殘齡此蓋伏遇

盛德并容至仁善貸憐臣粗有薄効察臣別無他腸擢
之廢棄之餘付以牧養之寄臣敢不布宣上澤安集小
民陳力就官皆出乾坤之再造捐軀報國願從矢石以
先登

代越州謝上表

待罪從官日憂餘譴分符樂土遽被優恩望外之榮感
極以泣中謝言念臣少年筮仕今逼華顛白屋起家晚
塵青瑣但以朴忠而自信未嘗苟簡以求安昨脫瘴癘

于嶠南旋冒冰霜于塞北謂使者之體義有必爭而衆人之言罪在不赦尚賴寬仁之在上但投閒散以思愆曾未移時已蒙易地越為大府道出故鄉湖山秀明人物富盛在臣之分得此已多此蓋伏遇乾坤有容日月無蔽察臣別無大過憐臣嘗近清光賜之便安哀此衰朽敢不以勤報國以靜牧民惟有赤心可酬鴻造

代信守到任謝表

一官寄祿每愧于叨踰千騎長人誤膺于擇任退循忝

冒徒切兢憂中謝伏念臣才不逮人少而專學謂斗筭
可以希廟器謂筭裘可以承家風因循壯年汨沒俗狀
再嘗為邑頗知平易之便民間亦佐州粗能畏謹于奉
法敢圖兼覆未寘嚴科察臣所守之無他假以方州而
自試此蓋伏遇皇帝陛下廓豐之照持罪之權役使萬
官悉復先王之法度顧瞻四海亦咨守吏之循良遂俾
妄庸得承空乏敢不激昂素志詢度善謀宣布上恩使之
無壅持循邦憲要以必行庶成毫髮之功以答雲天之

施

奏狀

辭免國子司業

準今月二十九日閣門告報除國子司業伏以朝廷設文學以首善于天下其教養之源最為深博將使閭巷之士皆有成材以應公卿大夫之選况更易科舉之際學術議論在所折衷凡領訓導宜求老成如臣之才無一堪可使冒處此義實難安乞回誤恩以允公議

辭免侍講

右臣今日準閣門告報已降誥命除臣兼侍講者聞命震驚不知所措臣學問荒虛知識寡淺承師之言僅能勿失誠不足以入侍宸几揚摧經訓所有誥命未敢祇受

辭免中書舍人

今日月二十三日準閣門告報已降告命除臣中書舍人者伏念臣區區之才雖自勉強而學不足以議論國體

文不足以發揮典誥備員東省纔及逾時能效無聞涉
歷猶淺假以名秩誠非所安况今臺省之官外及四方
非無賢才可以驅使如臣之愚止宜于舊職自効所有
新命未敢祇受

舉自代

蒙恩授前件職檢準勅節文諸職官諫議大夫以上授
訖舉一官員自代者右臣伏覩宣德郎祕閣校理通判
杭州廖正一志操清潔文學優深向者玉堂對策聳動

觀聽臣在館閣久與之處見其所守始終不移乞以代
臣庶允公議

代論湖南酒禁奏狀

伏以酒禁之設上以佐國用下以制民私行之天下功
利甚博臣以常平叨蒙朝恩奉使一道積日滋久頗見
民情竊以湖外一方事體與北州異以釀酒自業者家
家有之雖重其法禁其勢不止加以上戶富于財力偵
邏之人反為耳目其奸猝不可發而告捕所及常在細

民既陷深刑又責重賞一被追督立至困窮邀功之人恃法生事官吏稍不加察即枉陷平民國家權酷本緣財賦之不足營取遺利以濟公上而其患至此必恐措置有未得宜臣以為莫若散坊場錢于民間視其等第以為厚薄隨二稅輸入而罷其酒禁此最平易可以推行本路酒課在轉運提舉兩司每歲所入計若干萬以戶口較之每家一歲不過出錢若干而得終歲造酒以自便晏然無捕告之擾縲紲之禍州縣為之省刑官民

兩濟無甚于此况本路如潭州之安化衡州之常寧永州之東安郴州之宜章道州之寧遠見行此法民甚安之推之他郡必可長久湖南區區民貧地薄幸蒙朝廷蠲省鹽課莫不歌舞太平涵泳聖德至于酒禁稍加之損益遠方之民孰不幸甚臣職在按察親見利害不敢不言 貼黃臣比見諸路往往有麴錢隨夏稅輸納考其由來亦是前時嘗罷酒禁後來興利之臣更務掇取酒禁復行麴錢仍在法則太重亦為民患臣欲乞定著為

令如再議禁酤即民間出課利錢並與除放

上哲宗乞轉侍從官進對

元祐七年八月上
時為中書舍人

臣伏見前日近臣論奏乞罷侍從官轉對而專責以朝夕論思之効朝廷尋已施行臣以謂論思者侍從之事然苟不持之以法度則責無所歸言與不言各從其意論思之要果安在也昔唐太宗聞直諫則獎激之久不言則誚薄之風聲所感羣下自勵是以終貞觀之世中外無壅蔽之事朝廷無佞媚之臣政理之効優出近世

仁宗皇帝嘗御正陽門親策羣臣又嘗開天章閣召執政八人賜坐授以紙筆使條陳政事之要嘗謂輔臣曰近日上封事言政得失何其少也豈非言路壅塞所致乎英宗皇帝嘗謂范純仁曰近日風俗可嘉羣臣能屢來言事如此人君日有益矣仁祖英宗汲汲求人言如此是以至和嘉祐治平之政至今稱頌昨日陛下親御經筵許講讀官進對凡預講讀者不過五六人陛下聞其規戒之言亦多矣况侍從官不止五六人其言天下

之事者固多患在未有以率之而已伏望遠稽唐太宗及仁宗英宗勤求人言之義近推經筵許侍臣進對之意輪流侍從官二人進對令各陳所見擇其是者推行之則轉對之法雖廢而論思之責猶在也

十縣例狀

一作潭州十縣
議役法例狀

伏準使府指揮商議役法者照會近準使帖省符役錢寬剩不得過二分餘從下等減放竊詳朝省立法大槩欲蘇息細民寬饒下戶德意甚美然究之民間利害恐

有未盡須至申陳竊以役法之興者十有四年府庫雖
充民力漸困朝廷思慮深遠欲寬民力導迎和氣以致
頌聲于變革之初輕重疎密繫千百年利害不可不慎
不可不思今來若從下等減放其弊有三人之情重賦
不如輕賦輕賦不如無賦今若令下等人戶蠲放倍優
即有力之家爭為隱寄詭名典賣田土避露等第規免
官錢又有一戶之內分烟析生田畝既少役錢隨放舊
來州縣支用之外寬剩常有數倍充溢府庫不可勝用

今來所剩不過二分若役錢漸失則支費不充將何取
給又有上戶為見下戶役錢例得蠲免爭先出力收買
在己若不令增出役錢則上戶從此徼幸如今從而取
之則是額外更取民財不合法意其弊一也朝廷取于
上戶亦已多矣應折變麩糯麥豆船料木等及其他非
時科買首及上戶近歲又有家力家業等錢上戶物力
相繼破壞所謂下戶者雖號為貧乏而稅役不過以田
畝為率田畝既少出亦不多故常先辦而易集又有勤

力之民開耕荒地布種雜籽法當免稅等第未升而家
已饒足者比比有之若令減放特多無乃太幸以此較
之上戶太苦下戶太優其弊二也賦役之法損上益下
本非得已今自二稅皆從一畝以上均之有若干田即
出若干稅至于役法何獨不然法不均平衆且怨咨于
朝廷寬民厚下之美反有所損且非所以明示畫一垂
于後世其弊三也故以為自第一等至第五等隨田畝
多少均與裁減則法度平允敝事不生久遠可行寔為

利濟况朝廷廣開言路自山林之士市井之民上書進
狀各述所見今雖有省部指揮然立法之始亦取信于
郡縣今具利害如此伏乞備錄敷奏或申部聽候指揮

清江三孔集卷十一

欽定四庫全書

清江三孔集卷十二

宋 孔武仲 撰

啟狀

國學謝解啟

膠庠獻藝多至百千衡石程能濫居第一雜然衆論謂
非所宜最爾私心不能無愧竊以取士之道自古為難上
之人患在好求其名下之人病在不脩其實信其名則

開奔競請託之路失其實則成偷薄淺惰之風前世弊源多從此出本朝累聖臨制百年治平金革既橐衣冠甚盛屢降深詔博取實材使有司專務于至公欲後進不求于虛譽隄防甚密裁鑒愈明浮偽者莫得幸容諂邪者無由私謁既萃四方之俊彥又觀一日之短長失于俄頃之間繼以擯出之恥是則惟求實效非取虛名某性實鈍頑才非秀穎少服父兄之訓長好聖賢之書雖嘗從事于文章然尚未得其梗槩嚮者被黜于禮部

塊然留學于京師足不蹈王公之門名罕掛交游之口
豈期一旦之試辱在諸生之先退省其由非能自致仰
推其故抑有所緣此蓋伏遇某官佐佑睿明迪宣風教
造士而飾以禮樂濟世而納之中和雖用詞句而取人
本叔賢才以報國苟有技能之一得不求名實之兩全
故此迂愚階于冒忝敢不增其所未至勉其所當為庶
成毫髮之功少報丘山之賜

謝及第啟

法座顯昂廣攬四方之俊儒冠雜沓同升一命之榮顧
惟庸鄙之資亦預優殊之等逢辰甚幸揣已知慚竊以
為國者得士而昌濟世者取人尤急賓賢能以興三物粵
自乎成周之隆求儒術而闡大猷益盛乎西漢之後自是以降
為法不同或收孝廉或舉茂異尚經術者或起辨爭之
論取時文者或被浮華之譏然而豪俊亦出于其間國
家常賴以為治揭為成憲貽厥來今本朝紹三代之太
平講百王之遺美重規疊矩粹禮樂以陶斯民流風餘

波一中外以變于道家習俎豆里有絃歌薰蒸醇醲振
發光景矧乎京師首善遠追四學之風有司校文增用
間年之制法度皦乎晝日請託絕于秋毫窮山取材榱
楠歸匠氏之巧極深籠寶珠貝登廟器之華飄風泛乎
卷阿衆流積于巨海罕遺于野爭立于朝宴然極治之
時皇矣多士之國自非尤異難冒寵靈如某者抱斗筭
之小才承箕裘之素業少而好戲時人皆笑其迂愚長
匪通方詩律僅分于競病而自再被斥于鄉舉一偕計

于使臺念終軍棄繻之年宜觀于上國服揚子求師之
戒遂齒于諸生惜寸陰以競辰張短檠而繼日杜門幾
于不出取友期于必端作賦雖勤未窺蟲篆之巧讀書
務博不免涉獵之粗顧末學之何堪辱諸公之與進橋
門試藝偶冠于朋來宗伯程能復當于舉首指拙為巧
頗聞衆議之謹諱以淺測深適會天題之閑奧重以九
閩列戟百辟在廷容邁威顏顧瞻景幹魂欲落竊驚
帝所之遊利害未忘更懷金注之感吟吻幾燥抽思愈

窮聊因筆墨之成文難與騏驎而爭路退惟踈畧默俟
報聞及便殿之臚傳方堵牆而竦聽偶叨前列寔越初
心加以自幽遷喬不牽于常格提衡引重又出于大臣
澤滂草萊悸發夢寐非能自致實有所緣茲蓋伏遇某
官以夔龍之賢佐佑明主以周孔之道啟迪當時育養
英才爰若中陵之甚厚采収小善不以下體而見遺能
者引類而皆來否者聞風而胥勸分庭抗禮幾忘于尊
卑開閣見賢不私于遠近風流之及罷懦以興遂令閭

巷之小生亦分升斗之微祿敢不益求師範每勵官箴
佩聖訓于中庸止思言之相顧誦詩聲于大雅更期
明哲以保身投之于抱關擊柝而敢不固窮用之于班
朝治軍而或將有立庶成薄效以報大恩

謝曾學士舉升擢啟

伏蒙知府學士舉某才行堪任升擢者猥被甄收迄無
稱副退而自省悻不能安竊以才不易知必考其錯置
施為之當行尤難至又當觀其行藏出處之淳責以兼

長誰其兩得故聰明敏捷或不足以鎮天下之浮厚重
直方或不足以通世務之變此進脩者之所甚患而品
藻者之所難工今天子紹五世之隆攬四方之雋廟堂
之上有召對以察其言著定之間有考核以觀其效尚
虞英傑或滯幽潛詔在列之羣公講興賢之故事宜得
資深殆庶之彥絕倫軼衆之奇上裨神明旁警風俗如
某者蕞然小器藐爾諸生自聞詩禮之言頗好聖賢之
義謂高明光大為易至狹隘卑陋為可羞及乎年長而

志違始知力薄而任重感慨中夜頗憂學問之無成栖
遲小官尚喜紛華之未入方悟退藏之為佚敢邀進取
于其間不圖稱揚乃及狂斐溢于始望駭爾衆言責朽
質以增華究隆恩而有自此蓋伏遇某官蘊可大之業
懷知人之明行古處今故不遷于外鑠拔能進善又常
擇于中庸謂其有挾策弄翰之勤則假以文學之譽謂
其有抱甕守株之拙則形于志行之操雖華袞之誤褒
亦欲為中才之勸况青雲之所附又將成後世之名夫

何鯁生獨荷大賜敢不激昂美意步驟遠圖施設事功
已難任于濟世養完素履尚無負于知人過此以還未
知所措

謝史大卿薦館閣啓

伏蒙知府大卿特有薦舉者入幕之榮已叨于汲引登
瀛之美復被于薦論自顧無堪夫何以稱竊以甚盛之
世賢才多在于朝廷不肖之軀名姓未聞于天子欲有
待則懷後時之懼欲自舉則銜苟進之羞諒非特達之

知少置先容之地分甘淪晦孰與攜持伏念某行雖勵
而不高學雖勤而未至文辭不足以動人之觀聽智畧
不足以適變而縱橫侍親四方應書萬里負笈而游太
學久綴諸生之後塵奏賦而入明光獲沾九品之微祿
謂委吏之賤聖人處之而不辭則主簿之卑高士為之
而何愧優游下邑荏苒暮年顧俗狀之日增對陳編而
自惡尋祇召檄俾近府庭矧居庠序之中獲肆聖賢之
訓補苴舊學之闕紹緝前聞之餘坐廢官箴久糜廩粟

固已優容之太甚夫何推挽之頻仍此蓋伏遇某官粹
美內融清明外發德爵之重與齒而俱尊分寸之長取
人而不廢以謂褒揚一介之善雖若甚優激昂後進之
心不為無補故茲庸瑣得預品題至于議脩身之方圖
知己之報則古人之事皆可以有為大賢之門庶幾其
無辱

上曾內翰啟

性非俊明人不比數向游太學濫廁諸生辱矜其愚特

與之進賜之教誨而不倦所以成就者甚周比主文衡
擢在甲選夤緣竊第奔走劾官南方最遠于京師下邑
不通于郵置沉迷簿領凌雜米鹽未嘗得須臾之間以
此廢起居之間然而思嚮之切造次不忘恭惟寬仁尚
未斥絕近聞自石渠之清地出寶婺之大邦制俗有經
衛生無恙恭以某官天儲間氣時企絕流博學強識發
越乎孔孟揚雄之微高文大策馳騁乎晁董公孫之表
持操端直趣尚恬愉惡當世之爭先請一麾而出外譽

不為于赫濯政但布于優游卓然斯人風此天下其竭來
越土方侍親輿雖望得之不賒然請益之未果傾依文
席莞結寸心時當清和氣已煩溽更祈順序保衛慰人
願瞻

賀鄆州邵資政冬至狀

三微寢著重天統之為正萬類潛萌喜陽和之來復履
茲令旦錫以殊休恭以某官以輔翼之賢當藩屏之重
春生秋殺歲大鈞化育之功岱定河安繫元侯鎮撫之

力方矜鋒車之召更隆
岩石之瞻某坐係泮宮
阻趨門戟已聞遙道歌
山甫之遄歸願與士民
祝魯公之難老

謝舉京官啟

伏蒙制置發運大夫舉某
堪充親民任使者坐安尸
素方慚幕畫之無功曲借
吹噓賴有仁人之在上榮
逾所望感溢于衷竊以積
考遷官先王所以勵天下
之善因能舉類君子所以
育人材之多本朝基圖磐
安俊乂林植人流滋廣著
令愈繁至于脫名中銓引
次清禁叙階

文散之末升籍審官之嚴遂由此塗寔歷顯仕放于進
秩之始一澄微倖之原苟非其人豈稱茲選如某者天
資甚魯人望匪高徒知學古之勤未究適時之用初由
佐縣稍與從軍大學授官獨以不能而懇免方州授學
但知竊食以退藏中間累抱大哀塊居避壤餘生疲繭
壯志凋零加以昔仕漢濱嘗興水利身雖勞苦謀則闕
疎比經累年乃劾前咎亟書不實之罪仍罷所居之官
編席為門亦更歲月折腰為米復走江湖侵尋十秋危

苦萬狀驗鬢毛之早白疑骨相之多屯嘗親炙于誨言
幸竊官于治屬二天之託已足庇身隻字之褒更使增
價厚恩如此衆聽以驚此蓋伏遇某官豈弟為心清明
鑒物轉輸重寄暫領于東南衡石至公無嫌于遠近察
其片善之可錄待以至誠而不疑燭以餘光應之如響
遂令無似得預見收敢不味聖神之幾深考時變以消
息歛而飭已推以益官罄蚊力于丘山惟知勉勵釀蹄
涔于江漢少効報償

賀提點朝奉狀

伏審光奉宸俞已臨使郡伏惟慶慰恭以某官純明自得方雅不回會聖治之休明履朝行之華寵便蕃寄任較著事功遂膺綸言來按圖法利兼山澤益深寶貨之源用足都畿不絕歲時之入佇聞嚴召歸領近司某叨莅屬城阻趨門仞下情無任瞻仰之至

問候揚州陳丞相啟

伏念自託甄鎔亦更歲序士林無間嘗登元禮之門天

幸何多今任征西之府促裝云邁視庇如歸恭以某官
合德睿明兼材文武入居真宰持七政之璣衡出領元
戎拜三公之印綬雖方面倚專征之重而朝廷須兼濟
之賢乃眷東南方屬心于元老親逢旦暮行正位于上台
歲律崢嶸鈴齋閒暇更祈上為宗社精調寢興

賀運使度支啟

伏審祇奉宸俞榮將路漕消辰之吉賦政云初伏惟慶
慰恭以某官間氣自天至明周物遭聖時之圖任本儒

術以施為高步朝行屢將使指惟畿東之列壤寔海內
之上游少紆露冕之澄清庸副凝旒之宵旰然而以久
大之德業宜謀謨于廟堂佇對超邁入陪邇列雖萬一
孤貧之迹遽遠于庇存亦庶幾凋瘵之氓均蒙于惠澤
淮陽知軍問候啟

從仕萬里每多鞅掌之嗟向風十年未請須臾之間側
聆後騎暫弭東州教條從容誦頌洋溢念即官于旁郡
方進謁于高墉欣懼來并傾倒以冀恭以某官以豈弟

之德兼敏明之才華省人居應太微台星之位黃堂坐鎮有西京循吏之風朝廷方銳于收賢旦暮將馳于召節商飈愈肅戎壁多閒更祈上為邦家精調寢餽

賀滁州陳內翰狀

伏審光奉明綸寵還舊職伏惟慶慰恭以某官材堪王佐覺在民先炳然經緯之文章卓乎久大之德業入朝翔于侍從出偃息于藩維南土樂郊已布甘棠之詠西垣禁地復踐青雲之衢益隆當宁之知佇對賜環之召

遂登大任以稱輿瞻

謝舉官啟

伏蒙舉某堪充京官親民任使者久空官守誤齒薦書內
顧不能衆知甚幸竊以舉賢以類自昔非輕循次而遷
于今亦重使之脫名銓筦引次禁墀出試長民之能進
有立朝之漸自非施為足以壓衆望議論足以裨公家
苟預甄拔孰云稱愜如某者天資甚陋鄉譽非優少也
讀書頗期于高遠長而為吏益逼于賤貧越自壯齡復

嬰多難孤哀摧折顧餘喘之僅存擯斥罷閒出常情之不測侵尋至于強仕蹭蹬走于小官尋補吏于江東得備員于幕下涉筆而書紙尾殊非策畫之工斂板以揖道旁僅習將迎之末已更歲律茂補秋毫但茹尸素之譏愈積心顏之覩抵有司之禁方憂上累于見容稱屬官之賢豈期過及于不肖此蓋伏遇某官直方而閔大厚重而聰明處已以誠故不矜于外飾待人無間期必合于至公破崖岸而養之以寬量尺寸而忘其所短遂

令鄙拙亦合題評敢不益慕前脩更堅素節謹言行而
制之以義勉功業而期于有成惟不愧于初心可少酬
于知已

上曾內翰啟

伏審拜命宸廷即真禁館慈顏在恃是為儒者之極榮
清論滿朝皆喜鉅人之進用竊以近班之貴內相之尊
不徒專主于文章蓋亦上承于顧問其言則典謨訓誥
所以宣發乎皇猷其事則禮樂政刑所以參斷乎國論

向時沿襲于陳故以此待于高科今上總核乎偽真所用止于賢者尤為盛選首屬偉才恭惟某官沛然自得者高明深遠之資取以為助者緝熙光大之學平居慷慨欲措世于唐虞三代之隆一旦軒翔自致身于朝廷百執之右語皆時變動中事機喜逢獨斷之英屢進太平之策拱清光而問夜操新法以必行西閣掌綸灑灑乎有古人之遺美中書贊議洋洋乎鼓天下而不知將歷試于華途即次升于內職嘗觀先進自此為公卿之

階況在上知素許以宰相之器久矣廟堂之虛位顯然
海宇之宅心佇秉璣衡以盡康濟其技能蹇淺聲迹湮
沉游學京城最蒙知于伯氏劾官江左獲前請于館人
以茲幸為樂木之容不日託于大鈞之播側聆成命倍切
歡悰

發運謝大夫狀

竊拘吏職邈阻使臺聊叙瞻思仰祈聽覽遺簪可棄念
舊物之未忘空谷不盈雖遠聲而必答爛然溢幅榮以

寘懷惟盛德之所加匪薄材之能稱恭惟某官學通大道名重本朝剴裁外計之繁簡注上心之厚蕞然末品託在下風而乃待之甚親不為邊幅報之加厚如委瓊瑤茲雅度之素優為當時之所仰豈惟固陋獨被記憐方裨暑之在辰擁麗休之來輔更祈上為宗社精調寢興

問候長沙劉龍圖狀

伏以藩翰名臣天下想聞之有日衡湘巨鎮上心虛佇

于得人幸在下風獲覩亨會員弩道側甫脩縣吏之容
振衣座中復齒屬官之後溫顏春煦緒論風生迹雖遽
遠于門闌恩已退銘于心骨歲律茲晏棠陰多閒惟神
明之所持宜福祿之滋至恭以某官時才俊偉天資清
明忠義發于誠心文雅為之表飾使旌所涖藹然遺愛
之存朝位益躋擢在近臣之列錫之將帥之一節付以
方面之八州驩聲沸騰若望景星之見輿情安帖如倚
泰山之安佇拜異恩入陪大用

問候運判承議啟

祇膺詔旨夙駕使車副主上宵旰之憂為京師早曠之
患亟趨壽嶽共禱威神執圭幣以駿奔叨陪下綴為豐
登而表瑞將致嘉祥而復高步雲泉之嶺周尋先聖之
宅睨視萬物無異于醢鷄指歸九州同歸于培塿廓然
神觀繪以真空繼有篇章紀其風物瓊瑤爛照于瓦礫
爰居竊聽于咸韶幸會何多銘歲何極仰計皇華之報
命仍兼太守之行春興寢和平福祺純厚甚近從祀事

初返官曹遽奉甄收俾聯是正已就舟航之便即趨門
祀之嚴諸所威懷更祈敷叙

謝運判舉充文館啟

伏蒙運判承議舉充文館清要任使者寄祿民官蒞聞
善最奏書帝所特自襄陽思出門關感銘心骨竊以天
子虛心以求天下之士大臣協德以進天下之材得賢
能不為不多舉滯淹不為不盡然四海之廣難以周知
萬官之聯誰其偏識固有游心寂寞而不為勢利守義

個儻而不干公卿身雖隱于江湖志豈忘于廊廟慨歌
中夜翹首太平能挾沉淪之英心待豪傑之士如某者
幼而嗜學長乃從師殫意六經不輟于旦夜登科一紀
益用于驅馳粵來此邦乃長劇邑文書窘于應接獄訟
備于推求初心湮埋素業零落韜光匿景不求當世之
聞斥迹忘形幸有大賢之遇接之語而無間待以誠而
不浮繼以封章陳于旒辰至虛也而許之以實無譽也
而借之以名以朴為文以淺為博斯皆羣倫之未厭誠

非小子之能堪拜賜雖優負頗何厚此蓋伏遇某官有
推心之恕有燭理之明以恢張儒術為先以養育人才
為大且謂俗方凋敝士鮮中庸如溢美于一時俾取信
于當路獎勸之術其在于斯補報之方未知所處唯當
充事業之未達追企聖賢之所為庶有成功仰疇盛德

謝提刑舉充臺閣啓

伏蒙提刑大夫舉某堪充臺閣清要任使者猥被褒揚
迄無稱副退而自省慙不能安竊以三代之興兩漢之

治並收多士以致太平方其英俊朋來之時沛若雲龍
相得之盛雖賢才育養之有素亦先進汲引之使然今
天子紹復古初詢求儒雅四門雜遝接迹而賓升百郎
滯淹聞風而興起內之提衡則有輔相之重外之推轂
則倚岳牧之良廓然至公之路開晻然羣枉之塗塞宜
得脩士以聞治朝如某者德性非優天機不敏少而挾
策篤志聖賢之書長偶中科寄迹斗升之祿尋丁多難
僅有餘生栖遲小官顧塵勞之已厭荏苒強仕驚髮鬢

之早哀比領縣章獲依使部知吏事之難副每加訓戒
以丁寧念世好之未忘更以優容而撫接恩紀雖至報
効未聞亟得朋游之傳比蒙論薦之重許其學行待以
甄收雖不遺于寸長顧難厭乎公議此蓋伏遇某官蹈
道自信應物有餘慨然經濟之懷鬱于方面之寄論列
時病已流澤于斯民獎率士倫尤推心于後輩遂令孤
拙亦預題評蔚然黼藻之華賁于木石之陋使身不廢吹
噓皆自于先容如道未行聞譽由茲而益重其歸厚德

蓋倍常情敢不策勵遠圖倍增素守庶有涓埃之補以
酬卯翼之仁

賀元厚之狀

伏審祇奉宸俞已還官政伏惟慶慰恭以致政少保稟
天秀粹為世豪傑文學致身忠義結主黃扉貳政贊百
度之更新金節臨藩殿一方而增重暫侍經帷之密將
升宰席之尊慨慷丘園懇解印綬諸官叙秩寵陪師傅之
聯都門祖行雅多公相之餞遺榮當路養佚故鄉中外

爭傳共推進退之節縉紳知勸相趨止足之風某夙受
厚恩親聞盛事高山可仰尤切傾依大厦已成更深抃
喜

謝得解秀才啟

嘗謂方今之士類最盛諸郡之歲貢甚廉揜之以倉猝
之成落者存紛紜之衆負材而黜則自足收後効無藝
而中則何以弭羣言是非赴舉者之重輕寔繫主文者
之榮辱故夫端毫定次盥手剝封見一有望之人以為

無涯之喜如得在己相慶以言伏惟某人以勤勞之心
輔明敏之性浩乎學文之積萃矣議論之高如某乃荒薄
之資何以當考校之柄惟其自勵不敢少輕譬言弋者之
張弓忽連鴻鵠猶釣夫之垂餌遽獲鯨鯢出于偶然非
其力也而曲蒙謙德首賜長緘歸功于不肖之軀用何
報盛德之意春官覆實天陞程能冀餘勇之必先當大
敵而不血璠璣被采卞和免刖足之憂騏驎見收伯樂
無失鑒之誚實心所望指日以須

回許宣德狀

比承人乏叨領學宮少壯嘗遊已驚華髮智能素薄何
補後生不圖郵置之來遠借稱揚之重文詞溢發若紆
錦繡之妍情好加隆不改金蘭之舊把玩數四欣愧載
并緬惟宰制之餘無與寢興之適更祈保盡以對眷褒

回梅學士狀

竊束官曹洊更歲籥道山接武悵晤言之難追河梁摻
祛顧契濶之已久不謂記存之厚遠貽尺牘之珍馥如

椒蘭襲我襟袖把玩之際欣感載并恭以通判學士入
彀有年登瀛擅美珪璋其德而不耀繡繪其文而愈新
東觀育才蓋示顯途之漸南陔興念亟為別乘之行入
承甘旨之懽坐覽湖山之秀佇觀善最之來上即掩衆
俊而先馳霖潦息而川平木葉脫而秋晚更祈保畷以
副翹瞻

謝執政啓

東省冒居訖無能效西垣次補更竊寵光顧名秩之優

殊增心顏之愧厚竊以輔相天道雖出于機神頒宣帝
猷亦資于教命是以絲綸之地難乎潤色之才主上憲
章祖宗董正臣庶付之名器責以勞能訓詞形于一札
之間號令傳于萬里之外使夫脩飾者增氣偷惰者泚
顏叢然拭目之觀豈易代言之手况此中書之寮屬以
頒天下之豪英會朝入綴于近班刑政得聞于密議職
稍兼于吏事人當擇于時才如棊資止下中器非閱達
敏思于蹇淺之學決科以雕刻之文寢歷竒屯已逾少

壯會聖神之臨御從遐遠以甄收優游書林更涉歲籥伏
柱而當史筆王言皆得記之闕 盖有前世之成

效未有右文之代不崇好學之人雖擯斥流離欲擠之
危處而主張區別實引之清塗盖理勢之當然亦才能
之自致恭以某官秉德粹美見書博深發策決科久安
于下仕惡直醜正中困于巧言流落江湖幾至簞瓢之
莫續沉酣訓典不知軒冕之可榮否極必亨衆嗟未用
待以師傅素推宗室之賢王錄其勤勞乃入西崑之策

府佇觀遐舉足驗晚成願同籍之哀疲見登瀛之榮美
未諧往慶首辱過臨感慨之深敷陳莫悉

謝校書陳學士啓

伏審祗膺新命入校秘文除目初傳士心咸悅竊以西
崑策府典籍之所叢東觀書林英賢之攸萃網羅遺逸
之彥刊正訛謬之傳職業簡清寵光優渥米鹽細務不
至于耳目朝廷要選此為之權輿宸極之旁入而番直
縉紳之舊望若登仙恭以某官志行清純襟懷典徹學

優前世之載才適當今之宜早決上科已積公卿之漸間
隨遠牒發忘軒冕之榮遂膺側席之求來集藏書之館
牙籤鈿軸懽施丹墨之功金門玉堂更躡高華之路辱
珍函之見及知謙德之有餘感愧之深喻言奚悉

賀知梓州馮如晦學士啟

伏審光被制函進居策府風聲所及欣忭攸同竊原麗
正建官之初自開元致治之後直殿中之秘近叢天下
之英豪號為禮樂之司以儲將相之器本朝講修故事

育養名儒列職西崑專道山之勝地寓局東觀應星壁
之高躔亨塗所階仕路罕至恭以某官韜櫜經術服膺
聖門天人之際薰該龍虎之文煥炳垂紳朝位攬轡使
車卷舒各適所宜夷險不更其守一臺稱妙寢列于清
曹三館招賢方振于高步仍遂剖符之使以光衣錦之
行多士竦觀各期于自致同僚出餞更祝于遄歸特枉
華緘增輝蒞室至于感愧無以喻云

與臨江守啓

言念傾風遲久侍教阻脩聞鎮撫于敝邦屬沉迷于下
邑驅馳之迹勞甚起居之訊缺然方素節之戒涼計黃
堂之當暇神明來相福履增蕃恭惟某官才為吏師德
寔時望古直自守皎若壺冰之清塗歌相驩蒙乎棣萼
之化陟明之寵指期以須某編籍為民策名從吏及瓜
而代當至于故鄉維梓必恭願趨于崇仞更冀順序願
愛副人願瞻

回姚舍人啟

簡自上知擢居外制凡在輩類與觀寵榮竊以奉素以
從宸游儒生誰不願此聞命之下撫躬以驚此蓋伏遇
某官端委廟堂鈞衡人物一士未用則夙宵為之隱憂
片言可稱雖草茅無不省錄顧惟頑鄙久在題評浴之
以滄溟之澗去其塵垢提之于雲霓之路傳以羽翰寔
逢亨嘉皆溢願望某敢不深其所養培所未高謹畏保
身粗免有司之責公忠許國更希賢者之為庶有分銖

可酬汲引

回河北運使杜學士狀

伏審簡自上知出臨使部涓辰之吉視事云初伏惟慶
慰恭以某官學造機先識通世務早決科于上級久宣
力于熙辰涖職中臺振天朝之綱紀觀風北道瞻使者
之光華與舊俗之便安拯斯民之疲瘵邊儲山積豈惟
足食于九年禁坐天臨竚見承休于三接方懷門祀遽
捧音題感愧之深喻言奚悉

回維州黎朝請賀狀

比者叨膺上旨俾掌命書顧授受之非宜懷兢慙而未
釋豈謂某官曲推舊好時枉珍函許以先鳴增其凌雲
之氣示之溢美暋如贈袞之華殆無因而至前愧何修
而得此感銘斯至寤寐不忘方春之融受福宜厚願加
練養之粹少副傾翹之勤

回梓路郭運判賀狀

比者叨膺制旨進綴從官述作非工輒與中書之誥令
論思無取莫裨天子之聰明時恩雖優夕惕彌勵豈謂

某官交臂論舊傳郵惠書警以玉音遽醒其昏卧示之
袞贈絃極于褒言夫何淺鮮之姿亦奉勤渠之顧感服
斯至寤寐不忘江關甚脩笑語未遂更祈善衛以俟超
遷

賀陝西運使李學士狀

伏審光奉綸言擢居芸閣時恩所付公論謂宜竊以選
拔賢豪天下所由而治辦與司圖籍朝廷皆謂之清華
大臣捧詔薦論蓋以勸勵新進之士天子非時褒用又

將尊獎成能之人茲有巨賢式當明命恭以某官冲襟
雅度與學雄辭出逢熙凝之辰兼施藝達之政灼見官
屬之能否而持之以恕深知財用之利害而行之以仁
一意在公所臨有迹上方付以重寄須其顯庸廊廟之
才宜先養育蓬瀛之府姑使優游其如邊驛方馳軍嚴
未解木牛流馬之迭運實藉深思金匱玉室之所藏間
多成算佇膺急召歸立近班鵬圖巨量燕賀茲始首辱
華緘之賜益欽前輩之風感忭甚深敷陳莫悉

謝記室龔學士啟

伏審被命宸廷校天文祿凡在氣類舉同忻懼竊以鳳閣鸞臺均為近輔神謀聖算多付中書故其屬官最與國論當計議之未定得講其不然及制誥之宜行必使之起草朝下一札暮傳四方宣上意之所欲言曉人情之所未諭雖在要荒之外不殊畿甸之中是惟文章見用之時實關朝廷致治之要恭以某官造聖之域履仁之方挺然純一之姿全其剛大之氣起從科舉多士

服其英聲退處丘園後輩師其高節親遇唐虞之治勉
從園綺之招登預禮闈召居諫省嘉獎敢言之直丁寧
不次之除秉筆殿墀明上躬之勸戒演綸禁掖奉天旨
之褒優追復古風其在今日佇躋丞弼之任以副搢紳
之望尚篤故情首遷華翰感銘之至忤愧交并

回呂舍人啓

簡自上知擢居外制自聞茲命咸以謂宜大抵聚天
下之才為君上之使德隆則待異功茂則寵優將與共

萬幾之煩固非可一日而致故夫寘以近列付以美官
天子倚之代言宰相須其議事寵光繁夥職任優游豈惟
持橐之榮固是秉鈞之漸恭以某官富為己之學敏濟
時之功講明天人休咎之原究達古今安危之變一心
致主羞為管晏之卑三道進言遠希晁董之直術有大
而難用勢將亨而先屯親逢休明寢居華要遂自右螭之
近入居西省之巖藥石輸忠實賴箴規之益絲綸賦命
况高潤色之才佇參輔臣乃慰公論辱珍函之見及知

謙德之逾新感愧之深諭言難悉

又

簡自上知擢居西掖翕然善類同此驩聲欽惟萬乘之
尊獨運四海之大與其勤身于朝夕不若端本于朝廷
苟中書之政清則天下之心服所以疇咨時宰遴簡屬
官發越訓詞以明賞罰之信詢謀政事必關治亂之歸
號為近臣寢履重任取之至慎與此幾希恭以某官器
質閎深襟期靈爽研味六經之訓每造精微裁量萬事

之情訖無凝滯自決科于盛際久待用于壯年王謝衣冠獨高東晉淵雲翰墨最顯西京遂膺刺史之選俄正綸闈之拜俾潤色于王命仍典領于國書仰惟先正太師之功實為近世名臣之冠一時稱慕獨歌召伯之棠四輔維揚已撫封郎之坐佇膺大用以續前勲載循不敏之姿久託與游之末翩然鴻羽第美于翱翔投以玉音頻醒于冥贖感荷之至敷述奚周

回慶州范修撰啟

乃者羌戎未順邊鄙多虞擐甲執兵精銳充于塞下飛
芻輓粟轉餉交乎關中主上西顧慨然旰食勤甚疇咨
廟堂之輔精擇將帥之臣果得真才仰膺睿意恭惟某
官識周而邃器重以方該覽古今知其要務踐揚中外
藹有英聲輒于侍從之中付以方面之寄雖朝夕咨訪
暫虛持橐之班而樽俎笑談已盡禦戎之策佇告膚功
之就入先要路之躋霜律向嚴鈴齋多暇更祈保衛以

副願言

謝正字葉學士啟

光膺芝檢入正芸編賢者寢亨輿情驚喜朝廷求天下
之英俊聚之京師列禁內之圖書藏以館閣必得宏雅
絕倫之彥俾居清閒無事之中優游歲時飫飽篇籍養
之有素故賢能不俟于外求知之已深故職業可因而
器使或朝有滯淹之嘆而暮履亨嘉之途號為登瀛盖有
故事恭以正字學士時之豪偉人所觀瞻志氣不屈于貴權
辨說必由于道義江湖十載濱于困厄而不憂庠序諸

生叩以淵源而不竭籍甚當時之譽引從中秘之游步
奎壁之高躔證魯魚之誤簡學雖自得猶資鉛槧之勤
道不終窮更示甄陶之漸使得持尺寸之柄必能吐胸
臆之竒矯矯兀兀發為議論磊磊落落見于功名茲素
蘊之所宏寔善類之竊羨首垂珍翰但服謙光

與江西王運判啟

祇膺宸眷出奉使車已協剛辰甫頒清詔伏惟慶慰恭
以某官稟天之秀味道之醇早筮仕于熙辰自結知于

明主處之繁浩應以從容被江帶湖蓋遠于上國褰幃
露冕茲慰于輿情佇奉褒優入膺圖任方蕭辰之爽徹
亮泰宇之和寧更覲保調以符頌禱

與江東監司啟

比奉宸恩叨分郡寄叢然弱質顧無仁術以長民畀以
餘光幸有覽公之臨郡傾依茲始欣慰則深薰風已布
于天和輶傳俯臨于江國神明所相福祉攸同恭以某
官與學有源大忠不倚出逢熙盛之運外試將明之才

約束稱平吏民知畏奉皇華之臨遣已著事功秉介圭而入朝佇膺柄任願加保衛以副仰瞻

回馬漕狀

自遠門闌屢更歲序一麾易守欣承教之有期千里相存荷貽書而見及伏審寵臨劇部順履蕭辰神明密扶福祉增茂恭以某官賦明清之質負卓異之才上膺天子之知出顯使者之節敏于籌計瞻足太倉之儲坐以澄清竦動列城之觀佇承優詔歸列顯曹更祈上為邦

家精調寢膳

到任謝執政狀

越從支郡更刺大州受任踰涯撫躬知懼伏念某志雖好古才不逮人偶于患難之餘獲從英俊之後叨塵近列愧負明恩屢請為藩亦圖自効尋上宣城之綬稍揚章浦之舲盡涉江圻值秋瀾之漲溢少休官舍當歲事之豐穰已與吏民共安職業此蓋某官以研幾致用之學輔繼聖配天之功甄叙衆賢一于公義顧瞻雅俗臨

以從容遂令不敏之資亦冒長人之寄器有大小方懼
于顛隳政貴中和亦期于勉強誓殫蹇淺仰答陶鎔

到任與兩發運狀

比更郡紱甫視官曹鄙野之資豈任于朝寄光華之庇
寔賴于使臺方氣序之嚴凝亮福祺之繁茂恭惟某官
周廟之瑚璉鄧林之椶楠蹈軻雄儒學之純富研桑心
計之致上熟其聞望屬以轉輸江漢萬艘日移于紅粟
雲龍雙闕行奉于邃旒更其茂對寵光精調寢餼

賀處州大夫啓

祇奉宸俞出臨侯屏已消靈日就布寬條伏惟慶慰恭
以某官器質端凝襟靈開敏久更郡縣周知人物之情
初見吏民親諭朝廷之意佇收善最歸列顯曾首辱華
緘益高謙德感荷之至無以喻云

謝臨江鮑太守啓


德行賓興之風久蕭寥于鄉里賢能薦達之誼猶彷彿
于朝廷顧惟不敏之才偶在可言之地封畛相入熟講

于政經朋游公言共仰于儒行輒希類舉冀達聰聞某
官志抗浮雲心如虛谷不遠數舍貽之尺書謂戴記垂
文位以相先為重况周詩示戒言以不報為媮遂迂弄
翰之工俾以知人之列顧無稱副但有銘歲

回桂陽監簽判何承議啓

竊仰聲名屢更歲月宮如匏繫嗟各在于一涯惠以玉
音喜不遠于千里拜嘉甚厚揣稱尤慚時當大暑之流
行地介重湖之蒸溽神明所相興寢有休恭以某官以

學入官以儒飾吏朝無曠位宜尊賢者之居郡有治中
聊慰遠民之望諒非久抑即副旁求更祈治辦之餘無
與保綏之適頌禱之至敷述難周



清江三孔集卷十二